



Waageclique Rhywälle

Basel 1991

Fasnacht 1999

Sujet:

*Si koche in de Departemänt um d Wett
noch em Motto s het solange s het*

D Regierig ladet s Volgg vo Basel am Rhy,
zem erschte sümmerlige Roothuusmeeli y.
E jedes Departemänt brodlet im Grüppli
firs niedere Volgg ihr speziells Häxesüppli...

Die Summeraktion vo dr BAZ hett is irritiert
und is schwarz uff wyss vor Auge gfiehort,
dass unseri siebe Kepf bim regiere
kräftig in dr Polit-Suppe ummeriehere.
Unseri Regierig losst is nie vergässe,
was si aarichte, mien mir speeter ässe.

Vom Jögge Schild und syner Truppe
gits zem Entrée e Buechstaabesuppe.
Die wehre sich bekanntlig wie wild,
geege das bösi, bösi Namensschild.
Haisst ächt dorum Bolizei Vier Plus
vier zwängele und aine draits mit Gnuss?

Dr erscht Gang gits statt ere knusperigi Pekingänte
vom Baudepartemänt e Stiggli vo dr Nordtangänte.
und mechtsch vom Babsi none Supplement ha
griegsch scheen Gmischts uss dr KVA
und vo dr Dreiroosebruggbaustell no oobedry
ussbaggeretts ussem Bachbett vom Babby Rhy.

Fir dr Gang zwai verainigt sich s WSD mit de Finanze
und serviert fir die bloggt Kasse und dito Ranze
ussem Armehuus Basel, Blatz drei hinter Gänf,
als Malais à la baloise, Glepfer mit Brot und Sänf.
D Wurschtblättli sinn au no en ächti Occasion
ussem scho zimmlig abegrissene Joggelistadion.
Sisch sicher, dass es fir alli Glepfer git,
denn d Regierig wurschtlet jo wagger mit.

S Erziehigsdepartemänt isch so frei
und serviert uns Gang Nummere drei.
Vom Cornaz däm Chefbeamtehasser
gits ussem Blächnapf Brot und Wasser.
Mit grossem Grach duet är s Sportamt usemische
und jaggt dr Chef diräggt vom Biirostuehl in d Kische.
Dr Staatsanwalt wird sehr aktiv im sogenannte Fall Bai,
am Schluss blibbt aber nummen e schychs, mai, mai.
Fir gwissi Chefbeamte, me sott das jo nit vergässe,
wird das Regierigsmeeli zem wohre Abschiedsässe.

Ussem Sanitätsdepartemänt gits kai Gang vier,
bekanntlig sinn jo d Granggekasse oberstier.
Als Verisserli gits statt Novoseven e Panadol,
s nitzt zwor nyt, duet aber dr Kasse zimmlig wohl.
D Chefärzt daibele und hänn e grossi Wuet
uff d Schallere und ihre Gesslerhuet.
Sy kennes no sächzig Arbeitsstunde nit griesse
dä Regierigsdeggel als no lächelnd z griesse.

Das Regierigsmeeli â la Kanibâle
wird jedem Maage bald zer Qual.
Wird z Basel so wyter gwurschtlet, denn wird gly
die sümmerligi BAZ-Aktion e Lychemeeli sy.
Dää Umstand filzt is aber gar nit unseri Rueh,
uff dr Route hetts jo Wurscht- und Kebabständ gnuet.
Mir Rhywälle-Waggis lehn is dorum nit verdriesse
und wärde grad z laid, d Fasnacht dopplet griesse.

Uff em Minschter gits ebefalls ebbis z ässe
darfsch derby d Ladäärneusstellig nit vergässe

Dää Zeedel het is wie allewyyle d Druggerei Bürgin in Birsfælde druggt.